

SANTIAGO KARTA

Israel ji'j mteewa jxuka ũssatx Santiago fxi'jni

¹ Israel nasa doce ji'jsa naa kiwete msuuwa jxuka ũssatx weçxana fxi'jaçthu Jesukristo vxite' Dxusna selpisáa Santiago yaasesa.

Dxus yakh sxiigmée fxi'zewa'ja's Dxus ũçxáak kaajiyu'ju'

² Adx yakhthē'jwe'sx, nxusmée meswe weçxweçxa yajkxna ma'wēsawa thēysa vxyaatewa. ³ Mjiyuwe: Dxusa's jweeíçxáa çxhāçxha yajkxya' piyakahníçxáak txā'wē thēysa' vxya'. ⁴ Aça' thēysa vxyaatewa ũukhnuwe, txāa thēysa' i'kwe'sx kīhte yuhwa sxiigmée jxuka Dxus yakh çxhāçxha fxi'zewa'ja's kaapiya'jsa'.

⁵ Maawa Dxus yakh fxi'zewa'ja's sxiiguuççxa', Dxusa'síiçxáa mpējxwe, aça' txā' wa'lmée maatxwa jxuka kaajiyu'juna i'kwe'sx pēynite thaakwe. ⁶ Nawa kuh jwed yajkxmée ũsyujuna sūhna yuuçxáa mpējxwe. Txā'wēme', kuh jwed yaakxsa' tee jwedteçxáa ũsmée íkh wala's wejxaa kēese'jni na'wē yuutxna. ⁷ Aça' txā'wē tee jwedçxáa yaakxsame' Dxusa' ũsuna sūhwa'j ji'phme'. ⁸ Maawa Dxusa' pasmée wáanakx sūhna e'z jwed yajkxna pēysa' bagaçxte yuhwa Dxus yakhçxáa fxi'zeya' yu' ājameena.

⁹ Maa yakhthē'jwa kīhwa ji'phmeesaçxawa weçxweçxa yajkxna fxi'zewa'j ji'pha', Dxusa' pu'çxhina sūhna. ¹⁰ Aça' txā'wēy ji'phsawa txajx

ji'phuni pçuwa'j en pa'thewa, wëtwë't yaakxwa'j ji'pha', txãa pa'gatey naa kiwete ji'phsa' kitewa ma'wëga txaçxmeyna udxi' txã'wëysaçxá'.
 11 Sek açxaate', jxũth tasxa' udxi'k, naapkaçxha' kitewa ubu'k, aç'a zhiçxkwesa' kxtee pçu'k. Txã'wëy naa kiwete ji'phsawa txajx ji'phuni yakh pçuwa'jsaçxá'.

Ewmée yũuya' yaakxnisa's Dxusa' ũsu'çme'

12 Ewmeete kweete'jwa'jsa vxyaatewa, txã'sa' nwëese'jsame' wala yuh wëtwë't yaakxwa'j ji'pha'. Txãa pa'gatey txã'wë yũusa' bagaçxte yuhwa pçumée itxi fxi'zewaja's Dxus ũsya' neeyũuk txã'sa' jxpa'gawa'jsa' Dxusna nwëese'pha'ga. 13 Maawa ewmeete weteçxa', Dxus ne' txã'wëte wetewa'ja's vxit sũhwa'jme'. Dxusa' ewmeete wetewa'ja's bagaçxte yuhwa ũsmeena. Txã' ewmée yũusame'. 14 Wejxwa peekx ũus ewmée yaakxni's nwëese'pha'gaçxáatx ewmeete wetena pa'ja'. 15 Na'wë ewmée ũus yaakxnik pkalte kweete'je', aç'a txãa pkalku jweeíçxáa walaana u'jçxa nmehte' uuwa'jçxáa vxitna pa'ja'.
 16 Yakthë'jwe'sx mjiyuwe: 17 Na'wë Dxusa' cielute eena' kweethsatx jxuka vxitku sa' txã' açxpkaçx le'çxkweçxáa yuhwa yu'pthehmée ũsa', aç'a txajx tasxuçxaçxáa yuusata' kĩhwa ewsa yu' jxuka. 18 Txãak kwe'sxtxi peeygãhçxa txajx yuwe isasa's pta'sxçxa ewte fxi'zewaja's ũs, kwe'sx nyafxte txãa yakh utxasáa yuukahn.

*Dxus yuwe ma'wë jxkaathe' kxtey yuusaaçxáa
 Dxus yakh fxi'zesa'*

19 Txãa pa'ga adx yakthê'jwe'sx kîhwa pta'sxni ewsa yu'sa' bagaçxtewa wa'lmée jxpa'gaya'çxáa meswe. Nawa we'wewa'j yu'sa' ũus yajkxçxa jxpa'yajkx mwe'wewe, sa' ũusçxawa'j yu'sa' wejx wala mpa'yajkxwe. 20 Txã'wême', ũusçxanisa' Dxus dxi'pte ewmeesa', aça' Dxusa' txã'wěsa's jxpa'ga'çme'. 21 Txãa pa'ga kîhwa ewmeesa nakwe wala pehnaya' duda' txãa yu'sa' jxuka nvxihtçxa, Dxus yuwe ewsa pta'sxni yuuk txã'sçxáana wa'lmée ũuste myu'akhwe. Dxus pta'sxni' i'kwe'sx ũusa's nwe'weya' ãjawa'jsa'.

22 Nawa Dxus yuwe ma'wě jxkaathe' txã'sa' kxtey myuuwe. Wěse'jsaçxáa yu' yuunuwe. I'kwe'sxa' jxpubanuwe. Ĩ'neeçxáa wěse'jnisa' kxulsa'. 23 Maawa txã'wě Dxus pta'sxni's kxtey yuumée ĩ'neeçxáa wěse'jsa', peekx dxi'pa's speejute thegçxa 24 khũçxte uyçxawa txãa dũdtey khukhmée u'jyã'jçxa' ma'wě peçxkanakx txã'wěysa'. 25 Nawa wěse'jçxa peçxkanamée, Dxus ley ewte nvxiit-sa jxkaahni's kxtey nwěese'jsa', jxpubamée wět fxi'zena Dxus jxkaahni's nwěese'jna.

26 Maawa Dxus dxi'pte ewsath sũhçxawa ma'wěwa we'weni's jxpa'yakxmeeçxa', peekiçxáa jxpubasáa yuuna. Aça' Dxus dxi'pte ew fxi'zesath sũhni' kxul yuh yuuna. 27 Dxus dxi'pte kîhte yuhwa jxpubamée ew fxi'zesa' na'wě yũuwa'ja': Nmi' ji'phmée puuplesatx pu'çxna nxuste fxi'zesatx kvxiisxa'jna luuçx wakçxahtxwa txã'wěy yũuwa'ja', sa' naa kiwete ewmeesa peekx ũuste khěewe'sxte wala

jxpa'yakxwa'ja'.

2

Nasa ma'wēsaxwa txāa na'wēçxaçxāa ew yūuwa'ja'

¹ Adx yakthē'jwe'sx i'kwe'sxa' Jesukristo txakwe ewsana ũuste jxpa'gayã'jçxa', nasa maatxwa puutx ja'daçxah txāa na'wēçxaçxāa ew yūuwa'j ji'phi'kwe. ² Meeçxawa na'wē wāa yuune'kwe: I'kwe'sx pkhaakheni yatte teeçx piçthē'j ropa wala ewsa athçxa, vxyuu bee sultxhikha paatçxa u'kana, naapkaçxha' vxitewa pa'jana kīhwa ji'phmēe ropa iisxkwesa athçxa. ³ Aça' txāa ropa ewsa iijxūusa's ew jxpa'gaçxa kaçxni ewsate kaçx kajane'kwe. Nawa kīhwa ji'phmēe pxthaakuēesa's yu': Ayte myuju meeçxa' kxtee kiwete mkaaçx jīne'kwe. ⁴ Txā'wē yūuçxa', puutx ja'daçxah txāa na'wēçxaçxāa ew yūusamēe, vxite yu'sa' açeyaakxsaçxa txā'wē yuune'kwe.

⁵ Adx yakthē'jwe'sx ew mwēese'jwe: Naa kiwete makwe kīhwa ji'phmēe pxthaakuēesaçxawa txāawe'sxa' Dxusa's yu' ma'wēçxāa yuhwa peçxkanamēe ũuste yajxna fxi'zeçxa Dxus jxkaahna ũsnitewe'sxa's Dxusii ũsya' neeyūuk Dxusna yaakxsatxi' txā'sna jxpa'gawa'jsata'. ⁶ Txā'wētewa, i'kwe'sx yu' txāa ji'phmēe pxthaakuēesatxi' weeçxçxa ji'phsaçxáatx i'kwe ew we'we'. Nawa ji'phsaíçxāa i'kwe'sxtxi pkxuuçxa çkhuēs tasxsu kuutxa'jsamēe wáatxna? ⁷ Txāawe'sxiíçxāa Kristo yase's çaçewe'wesamēe wáatxna?

8 Dxus ley maatewa thaakwesa we'weçxa': Vxite nasatxwa peeygãawa'ja' idx ma'wëga ya'peeygãja' txã'wëyçxáa jĩ'k. Aça' txã'sa' kxtey nwëese'jna fxi'zeçxa', ewsaçxah txã'wë yuune'kwe. 9 Nawa maatzwa jxuka txãa na'wëçxaçxáa ew yũumeeçxa', pkalte weteene'kwe, sa' Dxus jxkaahni leya's yuuwesa yuune'kwe, leya's jxuka nwëese'pha'gamée. 10 Maawa Dxus jxkaahni leya's ew yuh nwëese'jçxawa teeçx ahte le'çxkuëçxáawa jxpubaana aça' txãa pa'gaçxáa Dxus jxkaahni ley makwetewa jxukak yuuwesa yu'. 11 Miiyajkxwe wakx Dxus leya' na'wëk we'we': Ptamsayã'ja' vxitesa yakh pkal yuuwa'jme' jĩ'k. Sa' nasanawa ikhwa'jme' jĩnak jxkaaja'. Txã'wë yã'the', nasa yu's ikhmeeçxawa, vxitesa yakh yu' pkal yuuwáana aça' txãa pa'gaçxáa Dxus jxkaahni ley makwetewa jxuka nwëese'jsamée yuuna. 12 Txãa pa'ga i'kwe'sxa' we'wewa'j ma'k yuu, meeçxa' ũus yaakxni yakhçxáa ma'k yuu, nawa wala jxpa'yakxmeete', i'kwe'stxi nwe'wesa leya' kastigaĩna. 13 Vxitetx peeygãhmée fxi'zesatxi' txã'wëy Dxuswa txãawe'stxi' peeygãhmée kastigaĩna. Nawa vxitetx peeygãhna fxi'zesatxi' Dxuswa peeygãhçxa kastigaĩmeena.

Dxusa's yaakxsath jĩsa' áate kaavxya'ja'jwa'ja'

14 Adx yakhthë'jwe'sx miiyajkxwe: Maawa Dxus yakh fxi'zesath jĩçxawa ew yũuna fxi'zeni yakh kaavxya'ja'jmeete', txã'wë yuwejuçxáa we'weniçxáa ¿seelpimanx? 15 Na'wë ũus yaakiga: Maa yakhthë'jwa ropa ji'phmée txã'wëy ũ'wa'jwa peejxsa

ũsuna, ¹⁶ aça' txã'wěsa's i'kwe'sxa' uyçxa': Pxthaaga yuuna fxi'ze'. Nawa açxha' wěemée kumamée ew mfxi'ze jĩçxawa, txajx kakwete peejini's kĩhçxáawa kaatu'jmeeçxa yuwejuçxáa txã'jĩni' ¿kĩhçxá' selpiima'k? ¹⁷ Txã'wě Dxus yakh fxi'zesath jĩsa' áate kaavxya'ja'jwa'ja'. Txã'wěme', yuwejuçxáa txã'jĩnisa' kxul yuja'.

¹⁸ Nawa na'jĩwáatxna: Idxa' Dxus yakh fxi'zesaçxa', ¿ma'wě kaajiyu'juki'g Dxus yakh yuh fxi'zesan sũjkahn? Aça' kĩhwa yũumeeçxawa mkaajiyu'j aan ájane'ga. Aça' adxa' ew yũuna pu'çxnisa yakhçxáa Dxus yakh fxi'zeni's áate kaavxya'ja'jya' ája'nja jĩtxna. ¹⁹ Idxa' teeçx Dxusçxáa cielute ũstewa txã'sa' ew jiine'ga ũuste. Txã'wě yũuni' ew yuja'. Nawa eçxthē'jwa Dxus ũste ew jiita' idx na'wěy. Txã'wěçxa'itx ũukhna yaya'. ²⁰ ¿Ma'wētega jiyu'çmée? Yuwejuçxáa Dxus yakh fxi'zesath jĩni' kxul yuh yuuna, Dxus yakh fxi'zeni's áate kaavxya'ja'jmeete yu'. ²¹ Kwe'sx yaçgathē'j Abrahana' Dxusna yaakxni's áate kaavxya'ja'jna txajx nçxi'k Isaakha's altalte ikhya'wak yu'. Txã'wě Dxusna yaakxni's áate kaavxya'ja'pha'ga, Abrahana's Dxusa' yuuwemeesak vxit. ²² Açxha' ¿jiyugá'? Abrahana' áate kaavxya'ja'kh Dxusna yaakxni's sa' yuwejuçxáa Dxusna yaaki'th jĩmée, Dxusa's ũusuh jxuka yajkxçxa áate kaavxya'ja'kh. ²³ Abrahana' Dxusa's ũusuh jxuka yajkxçxa kxtey yuupa'ga, Dxus libroute na'wěk fxi'jni neeyũ: Abrahana' Dxus dxi'pte ewtek neeyũu jĩna. Sa' txã'wěy Abrahana' Dxus namiku' jĩnik neeyũu.

24 Āçxha' jiyui'kwe, yuwejuçxáa Dxusa's yaaki'th jímée, Dxusna yaakiççxa' áate kaavxya'ja'jwa'ja'. 25 U'y kazx yuusáa Rahabwa Dxusna yaakxni's áate kaavxya'ja'kh na'wē yūuna: Txajx yatte piçthē'j peethegu'na pa'jsatx jxpa'gaçxa', txāa piçthē'jtx nwe'weçxa vxitee dxi'jsuk kaah txāa u'ya'. Aça' txā'wē ew yūupa'ga txā'sa' Dxus dxi'pte ewtek neeyūu. 26 Kwe'sx kakwewa ma'wēga ūus ji'phmeeçxa' uunii yu', txā'wēy Dxusna yaaki'th jīnisa' seelpimeesa', ew yūuna pu'çxnisa yakh áate kaavxya'ja'jmeete yu'.

3

Kwe'sx thune' na'wēsa'

1 Adx yakthē'jwe'sx, maawa jxuka kaapiya'jsaçxa' jiiisatha'w sūhçxa nuywe'wenuwe. Kaapiya'jsaçxawa jxpa'yajkx mfxi'zewe. Txā'wēme', kaapiya'jsaíçxáa thaakwe yuuwesa yu'nja'w. 2 Maa yuhwa jiisa yu' meetha'w. Txāasa íitha'w kīhtewa jxuka jxpuba'. Nawa maawa txajx we'weni's jxpa'yakxya' ājana txā' ewsaçxah txā'wē yuuna. Sa' txā'wē yūuçxa', txajx kakwe'swa jxuka neeweya' ājana. 3 Nwēese'khantha'w jiba yuwete fxrenu paathe', aça' txā'wē yūuçxa' jiba kakwe's ewsu kaajxa' āja'tha'w. 4 Mjiiyuwe, barko txakwe seena' walasa's wejxa wala fxiiisu jxūna u'juçtewa, barko's kaahsa' timon le'çxkwesajuçxáa tuphyna ku'lek kaja'. Aça' barko txakwe seena' walasaçxawa nwēese'je'k ma'wē kaathewa. 5 Txā'wēy kwe'sx kakwete

thune wala le'çxkuēesa ji'ptha'w, nawa seena' yuh walasa na'wē we'weya' çxhãçxha'. Txã'wēy ipx makwe le'çxkuēesaçxawa, yu'kh makwe seena' walatewa jxuka kabuna. ⁶ Kwe'sx thunewa ipx na'wēysaçxá', kwe'sx kakwe's jxuka suwçxa naa kiwetewa jxuka āawa'jsa's kwe'sx kakwete ki'pni ji'ptha'w. Bagaçxte yuhwa ũçxhamée infxiernote ipx na'wēsa'. ⁷ Yu'kh niimal vxite' ēega fxuusa vxite' yu'gawe'sx eçx ma'wē seena' juuna'satxwa nasa' kaastxaja'jya' āja'tx. ⁸ Nawa thune yu'sa' kim yuhwa kaastxaja'jya' āja'çmeeta'. Txã' weneno ikhsa', txāa pa'ga kaastxaja'jya' ya'āja'çme'. ⁹ Txāa thuneju Dxus kwe'sx Tatanawa weçxana tuuthe'je'tha'w, sa' txāa thunejuxçxáa nasatxwa wēesxuna ewmée açewe'we'tha'w Dxus taki'jçxa nvxiitnisatx. ¹⁰ Adx yakhtē'jwe'sx, txã'wē yu' txāa yuwejuxçxáa Dxusna tuuthe'jna ki' açewe'wena yuuwa'jme'. ¹¹ Teeçx yu'ĩçteçxáa yu' sxūusa kasehna ki' yu' yaasawa ¿kasehma'k? ¹² Adx yakhtē'jwe'sx, miijajkxwe: Sxlala tasxa' ¿uhçe yūnya' ājama'k? Aça' uçe tasxa' ¿sxlala yūnya' ājama'k? Txã'wēy teeçx yu'ĩçteçxáa yu' e'z jwed kasejxa' āja'çme'.

Na'wē yuunisaçxáa kīhtewa wala jiisa yuunisa'

¹³ I'kwe'sx ksxavxyte kīhtewa wala jiisa ũsçxa', kīhtewa puiimée zhiçxkwe fxi'zewa'ja's mkaavxya'ja'jwe. Txã'wē wala jiisa' kīhtewa juuna' iijwejçx yajkxna fxi'zewa'jme'. ¹⁴ Nawa i'kwe'sx ũuste ewmée yajkxçxa pui'nja sūhna yaakxsa' txã'wē wala jiith sūhna iijwejçx

yaakxwa'j ji'phme'. Txã'wě yaakxsa' kĩhte yuhwa jiimeesa ãsxiisa yuuna. ¹⁵ Txã'wě ewmée yũuwa'jçxáa ũusuthenisa' Dxus kaaũusuthe'jnime'. Naa kiwetewe'sx peekx i'kwe'sx ũus yaakxnisaçxá' eçxthě'j kaaũusuthe'jnisa. ¹⁶ Mteewa iiwejçx yaakxwa'j kasehnijũ' puiiwa'jçxáak vxya'. Aça' txajũyã'j yu' jxuka suweena ewmeesaçxaçxáak kaseje'. ¹⁷ Nawa Dxus kaaũusuthe'jni's ji'phsa' kĩhtewa pkal yuumée fxi'zena, ewçxáa yũuna, puiimée nasatx peeygãhna, ãsxiimée isa we'wena. ¹⁸ Aça' puiimée ewçxáa yũuna fxi'zewa'ja's pa'pçxusa' ew wět fxi'zewa'ja's uyuuna.

4

Naa kiwetewe'sxa's selpiite', na'wěk ya'yu'

¹ I'kwe'sx pwe'sx puii jxpakwena fxi'zeni' çmajũga kaseje'? I'kwe'sx ũusujk kaseje', ewmée yũuwa'ja's yaakxpa'ga. ² Vxitee ji'phunitx iiyamu wěeçxawa ãjameeçxa', ikhya'çxáa i'kwe yaaki'. Vxite nasa kĩhçxáawa ji'phte', txã'sna kusa'jya' ãjameeçxa', puiiya'çxáa i'kwe pa'pçxu'. I'kwe'sx peejini's Dxusna pějxmeeçxa i'kwe uyya' aja'çmée. ³ Pějxçxawa, jxpa'gaya' yu' aja'çmée i'kwe, txã'wě ewmeete kseelpi'jya'çxáa pěypa'ga. ⁴ Dxus yakh weh yuhwa ewmée fxi'zesa mwēese'jwe: Naa kiwetewe'sxa's selpiina fxi'zesa' Dxus yakh puiinisate jiimeewá'kwe. Maawa naa kiwetewe'sx yakhçxáa wět fxi'zeya' yaakxsa' Dxus yakh puiisak yu'. ⁵ Txã'wětewa, kwe'sx ũuste nvxiitnisa Dxus Espiritu' wala kçxhãaçxha'jna

ũsa' jĩ'k Dxus librute fxi'jnisa' txã' ĩsxiinisame'.
 6 Naapkaçxha' Dxusa' jweeĩçxáak kwe'sxtxi
 peeygãhçxa pu'çxhi' kĩhtewa. Txajũik Dxus
 libru' na'wẽ pta'sxi': Dxusa' pu'çxhi'çme'
 iıwejçx yaakxsatxi', nawa iıwejçx yajkxmée
 fxi'zesatxi' wala peeygãhna pu'çxhina jĩ'k.
 7 Txãa pa'ga Dxusçxáana nwẽese'jçxa eçxthẽ'ja's
 nwẽese'jmée çxhãçxha miiyajkxwe, aça'
 eçxthẽ'ja' i'kwe'sx tasxu ajameeçxa txuteena
 u'jwena. 8 Dxus tasxte mutxaawe, aça' txãawa
 i'kwe'sx yakh utxaana. Pkalsawe'sx, ewmée
 yũuni kusetx miiyaatewe. Txã'wẽy Dxusa'sçxáa
 yajkxmée e'z jwed yaakxsa i'kwe'sx ũusa's
 miiyaatewe. 9 Sa' txã'wẽ ahmeene'tka'w yũu
 sũhna miiyajkxwe, sa' sxijkana fxi'zepa'ga açxha'
 ũ'newa'ja's miiyajkxwe, sa' weçxana fxi'zepa'ga
 açxha' nxuswa'ja's miiyajkxwe. 10 Açxha' Dxus
 dxi'pte seena' yuh ahmeekwesa myuuwe, aça'
 txã'wẽ yũusa's walasa vxituna Dxusa'.

Yakhthẽ'jwe'sxtxi ewmée nuywe'weni

11 Yakhthẽ'jwe'sx, i'kwe'sx pwe'sx puutx
 ewmée ya'nuywe'wenuwe. Maawa yakhthẽ'ja's
 ewmée nuywe'wesa' Dxus jxkaahni ley
 peeygãawa'ja's we'we'k txã'sna weeçxsa yuuna.
 Aça' Dxus jxkaahni leya's weeçxsa' txãa leya's
 nwẽese'jepkaçxte leya's jxkaahsa na'wẽsa
 yuuna. 12 Txãa pa'gatey leya's nvxiit-sa' teeçx
 yuuçxáa ũsa'. Txãaĩçxáa ewmeete nvxiitwa'jsa'
 sa' txãaĩçxáa ki' nwe'weya'wa ajawa'jsa'.
 Txã'wẽte', çidxçxáa jwee kimçxaga txã'wẽ
 yakhthẽ'jwe'sxtxi' ewmée nuywe'we'?

Kuskuskhē' kīh yuuya'watewa jiimeek ya'fxi'ze'

¹³ Āçxha' i'kwe'sx na'wē we'we'i'kwe txā's mjiyuwe: I'kwe'sx we'weçxa': Āçxh u'jmeeçxa' kuskusa' u'jwe'nja'w çxhab walan. Kxtee pa'jçxa teeçx anxu mjiiçxa vxyu wala knayna ũsu'nja'w jī'i'kwe. ¹⁴ Nawa kuskus fxi'zewa'ja's jiiimée i'kwe. Kwe'sx itxi fxi'zeni' na'wēsaçxá': Yu' ahwa ma'wēga tudteçxáa vxyaaçxa' ēekhēe pçu', txā'wēysaçxá' itxi fxi'zenisa'. ¹⁵ Txāa pa'ga na'wēçxáa yaakxwa'ja': itxi fxi'zewa'j Dxus peesuwaana açá' ma'wēçxáawa mji'nja'w jīwa'ja'. ¹⁶ Nawa txā'wē yajkxmée ũuste ii-wejçxçxáa i'kwe yajkxçxa we'we'. Txā'wē ya-jkxçxa we'wenisawa ewmeesaíçxá'. ¹⁷ Maawa ew yūuwa'ja's jiiçxa ew yūumeeçxa', Dxus dxi'pte yuuwesa yuuna.

5

Ji'phsawe'sx mpa'yajkxwe

¹ Āçxha' wala ji'phsawe'sx mwēese'jwe: I'kwe'sx ji'phuni pçuute seena' yuh nxussa pa'jana txā'sna yajkxçxa weyna mpebeewe. ² I'kwe'sx ji'phunisa' kīh yuhwa seelpime' jxuka wa'wani', açá' i'kwe'sx ropa ewsawa txā'wēy jxuka wes ũ'ni'. ³ I'kwe'sx vxyuu beh vxyuu çxihmewa jxuka iz ũ'ni', açá' txāa vxyu iz ũ'nisaíçxáa i'kwe'sxtxi' seena' wala ewmée nxus kiwete akhwa'jsa'. Txāa vxyu' i'kwe'sxtxi ivxiituya'wa' ipx na'wē. Naa nmeh ensu' i'kwe'sx ji'phuni's iiméh wala jxaaw i'kwe. ⁴ I'kwe'sx uuthasxte mjīisa yuul pēyni's Dxus cielute jxkaahna ũssa' wēse'kh, açá' i'kwe'sx piuntxi

yuulunisa txã'wẽ i'kwe'sxtxi ewmeete nvxiht-ya'wa'. ⁵ I'kwe'sxa' naa kiwete ji'phunisa yakh wala wět weçxana fxi'ze'i'kwe tajkx na'wẽ niisxna txãa pa'ga ikhwa'j en pa'jya'wa'. ⁶ Nasa ewmeesata' jĩçxa i'kwe'sxa' ewteçxah ikhe'i'kwe yuuwemeesatawa, aça' txãawe'sxa' kxulteçxáa uuwa'ja's ji'phu'tx.

*Thěysa pa'thewa nxusmée fxi'zeni, txã'wěy
ãça'sa pa'gatewa Dxus yakh puutx we'wena*

⁷ Txã'wẽ pkuuçtewa, yakthē'jwe'sx nxusmée çxhãçxha miiyajkxwe, kwe'sxtxi jxpe'jsa Jesukristo naa kiwete kĩhpkaçx. Ma'wěga mjĩisawa uhçxa' kuçxwa'jmée ũythasu', nus en skhēwte', ũ'a's wala pkhakhe'nja sũhna. ⁸ I'kwe'sxwa txã'wěy kuçx yajkxmée çxhãçxha yajkxna mũythaswe. Txã'wěme', kwe'sxtxi jxpe'jsa Jesukristo kĩiwa'ja' utxaaça'. ⁹ Yakthē'jwe'sx, puutx ũusçxawe'wena fxi'zenuwe, Dxusa' i'kwe'sxtxi ewmeete nvxiitkahmen. Txã'wěme', yuwee ku'le'sa khuēs pajwa'j en utxa yã'j ũsa'. Txã' Dxusa'. ¹⁰ Txãniitey Dxus yuwe's pta'sxsawe'sxwa ma'wěta pxthaa yuuna fxi'zeçxawa Dxusçxáana yajkxna fxi'ze', txã'wěy thěysa nxuswa'j vxyaatewa, Dxusçxáana yajkxna mfxi'zewe yakthē'jwe'sx. ¹¹ Txã'wě pxthaa nxuste fxi'zesatxi' Dxus yakh wět fxi'zesata' jĩ'tha'w. Job pxthaa nxuste wantãyna fxi'zete', nmehte' Dxusa' wala peeygãhçxa pu'çxni's iiwěse'ji'kwe i'kwe'sxa'. Dxusa' peeygãasa', txãasa pu'çxya' ũsa'.

¹² Adx yakhthē'jwe'sx, wala mpa'yajkxwe. Isasa's jiiçxa' jiith jīwa'jçxá', sa' jiiimeeçxa' jimeeth jīwa'jçxá'. Txã'wē Dxus uyte jiiimeeth jīwa'jme', sa' cielu kiwe txã'wēsatsxwa kxsusna pta'sxwa'jme', Dxusa' ewmeete nvxiitkahmen.

¹³ I'kwe'sx pwe'sx maawa nxuste fxi'zena ūsçxa', Dxusçxáana neewe'wena meswe. Maawa wēt fxi'zena ūsçxa', Dxusa's weçxana memna meswe.

¹⁴ Maawa akate uuya' ūsçxa', ancianowe'sxtxi mpa'yawe, aç'a' txãawe'sxa' Dxus kusete neewe'weçxa aceite ki'putxna.

¹⁵ Txã'wē Dxusa' pu'çxhina sūhçxa oraite', aç'a'sa pkala' peltunāyni yuute, aç'a'sa' ewte neeyūuna, txajū' Dxusa' nuykatxhina.

¹⁶ Dxus dxi'pte āhmée yūuni's puutx ya'mpeeta'sxwe, aç'a' Dxusa's yakhthē'jwe'sx neewe'wete', aç'a'sa' katxhine'kwe. Dxusna nwēese'jsa txã'wē ūsuh jxuka Dxusna yajkxçxa neewe'weni', kīhtewa jxuka pu'çxwa'jsa'.

¹⁷ Ma'wēga Dxus yuwe pta'sxsa Eliaswa kwe'sx na'wēysaçxáaçxawa, nus pa'khamen Dxusna ūsuh jxuka yajkxçxa neewe'we, aç'a' nus pa'jme' tekh anxu y medio āhpkaçx.

¹⁸ Txajū' ki'kin Dxusna neewe'wek nus kīikahn, aç'a' naa kiwete ki' nus pa'the', uuthasx çxhāçxhatx.

¹⁹⁻²⁰ Adx yakhthē'jwe'sx mjiyuwe: I'kwe'sx maawa Dxus dxi'pte jxpubate', jxpubasame' txãa jxpubasa's ewmée dxi'ju kaasxwedu'juna. Sa' txã'wē yūuçxa' jxpubasá ūus jxukate vxituwa'j yā'j ūstewa, nwe'wesa yuuna, sa' maazkuēe pkaltxiwa kaapeltunaĩ'jsa yuuna.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

06da09f4-8d0f-5001-ae8c-0e6aa0131ffd